

Bouônjour tout l'monde, ch'est Merry Bond tch' a l'pliaïsi d' vouos présenter la lettre Jèrriaise aniet, Sanm'di lé vîngt huit dé Juîn 2025.

J'voudrais vouos pâler d'la jouaie d'êt' eune grand'méthe, ouaithe qu'au c'menchement ch'tait eune belle surprînse! Lé vîngt d' Janvyi, l'année pâssée, j'd'vîns eune grand'méthe pour la preunmié fais, la grand'méthe à Eden Ivy Bond. J'l'aimis d'pis lé preunmié moment qué j'la vis.

Eden profite d'êt' entouothée par eune fanmil'ye tchi l'adouothe, la mâjorité dé tchi d'meuthé en Jèrri. Oulle a deux pathents tchi l'aiment, quat' grandpathents tchi l'aiment et sept grands-grands pathents tchi l'aiment et quat' tantes et oncl'yes tchi l'aiment étout! Eune mèrveilleuse dgaîngue pour env'lopper Eden d'amour.

Chenna a 'té si spécial dé la vaie s'dêv'lopper et pâsser du temps auve lyi châque s'maine, à cânichoter chu bieu mithacl'ye auve ses grands blius ièrs tchi 'taient fixés sus les meins, dé vaie ses preunmièrs souôris, ses preunmièrs grîngn'nies et ses preunmièrs efforts à mangi du mangi solide – i' faut s'ramémouaither d'êt' tréjous prêpathés à porter la pliûpart du dînnner sus sé!

Eden c'mencht à grappîner à l'âge dé siêx mais et i' y' a rein qu' deux jours achteu qu'oulle a c'menchi à marchi – et j'sais qu'rein n' s'en va l'arrêter! I' s'en va faller garder nos ièrs ouvèrts!

Ou peut dithe plusieurs mots, mais l'mot, lé pus prêcieux pour mé qu'ou dit ch'est Manman! Oui - j'sis nommée 'Manman' et man bouônhomme est 'Papa'. Ch'tait împortant dé faithe sèrvi des noms Jèrriais pa'ce qué j'êprouve à pâler à Eden en Jèrriais – J'l'ai fait d'pis qu'ou fut née car j'veurs qu'ou sache la langue dé s'n île et ch'est bouôn pour mé à pratitchi autant qué j'peux et ch'est eune bouonne maniéthe d'apprendre des nouveaux mots, comme les noms des flieurs, d's hèrbes et d's îsectes,

pouor qué j'pîesse lî dithe quand j'sommes ensembl'ye dans l' gardîn.

Ma belle-fil'ye, Eleanor prend Eden à la bibliothèque pouor faithe 'Rhyme-Time' ensembl'ye. l' y' a des arînmées et des p'tites chansons en Jèrriais et en Angliais. Eden aime bein chu temps-là et j'chantons les mêmes arînmées et p'tites chansons siez-nous et achteu toute la fanmil'ye font les salutâtions et disent 'à bi' en Jèrriais, chein qu'est magnifique.

Eden aime bein êt' déhouors et aime marchi dans l' gardîn. Ou tcheint ma main et j'èrgardons et j'sentons l's hèrbes et les flieures ensembl'ye. J'aime la natuthe et j'aim'thais qu'Eden l'aime étout. Jé d'meuthons dans eune diversément belle île et j'sommes bénis d'aver tant d'belles grèves et un paysage tch' est si bé.

J'sais qu'man bouônhomme la prendra sus eune plianche dé surf autant qu'possîbl'ye, à la pousser dans des p'tites louêmes dans un tout p'tit fâ d'mé! Pouor lé moment il est heûtheux qu'ouille aime èrgarder lé football sus la télé auve li! Ch'est drôle pa'ce qué san p'pée, not' fis n'aime pon l' football! Et Eden aime bein quand Papa joue san ukulele pouor lyi. J'aime chanter en Jèrriais même si mes chants sont grées par mé-même et tch'i n'sont pon si bouôns mais l' la font souôrithe.

La s'maine pâssée 'tait lé huiptantchième anniversaithe à man péthe et ch'tait bein dé vaie toutes les généthâtions ensembl'ye pouor fêter eune telle occâsion. Eden 'tait là pouor chârer l'èrpas spécial dans sa haute tchaise au bût d'la tabl'ye.

Ch'est eune bouonne chose qué j'aime êt' manman et qué j'nai pon d'peux des drapieaux, nitout du morvé pa'ce ma belle fil'ye attend lus deuxième êfant au mais d'Octobre.

J'voudrais encouothagi les pathents et grandpathents auve des p'tchiots d'aller à la bibliothèque pouor 'Rhyme Time' les Jeudis duthant les tèrmes scolaithe dé 11 heuthes à 11h30.

S'i'vouos plâit contacter Robyn Conway [r.conway@jeron.je](mailto:r.conway@jeron.je)

l' y étha étout à la bibliothèque un nouveau cour dé Jèrriais pour les c'mmenchants au Vendrédi à l'heuthe du dînnner (12h30 à 1h15) duthant les tèrmes scolaites tchi c'mmenche au mais d'September.

S'i'vouos plâit contacter Merry Bond [m.bond@jeron.je](mailto:m.bond@jeron.je)

Mèrcie bein des fais pour m'aver êcoutée, à la prêchaine!